

REPORTAGE

BENEDICTA MARZINOTTO

La economiste furlane che e salve la Grece

Al è di une economiste dal ateneu furlan chel che al è stât definît de stampe nazional e internazional il Plan Marshall pe Grece. Benedicte Marzinotto, laureade in Economie a Udin intal 1998, master e dotorât ae London School of Economics e je ricercjadore confermade in politiche economiche ae facultât furlane di Economie. Intal fevrâr 2011 cuntune publicazion presentade ancje ae Comission Europeane, e propon di disblocâ i fonds structurâi pe coesion, in mût di sostignî il recupar de economie greghe cun gnovis infrastruturis: 12 miliarts di euros za



destinâts a Atene ma blocâts in spiete dal cofinanziamet grêc e che invezit, se diliberâts, a varesin podût compensâ i efjets negatîfs dal consolidament fiscâl rilanzant la cressite. Une publicazion tant che altris che in maniere providenziâl e rive fin al president de Comission Europeane Jose Manuel Barroso, che le fâs proprie. Po dopo al rive ai Stâts membrîs, che in tancj si declarin favorevui. Di li al nas il Plan Marshall pe Grece che al puartarà la studiose furlane ae ribalte internazional cun doi articui ancje sul Corriere della Sera e une lungje interviste su Rai Radio 3.